



Vischnaunca Tujetsch
Gemeinde Tujetsch

Protocol dalla radunonza da vischnaunca

dils 26 da zercladur 2020

allas 20.00 uras ella halla plurivalenta Dulezi a Sedrun

Protocol dalla radunanza da vischnaunca dils 26 da zercladur 2020 allas 20.00 uras entochen allas 22.30 uras, ella halla plurivalenta Dulezi a Sedrun

Presidi: Beat Roeschlin (president communal)

Actuar: Simon Collenberg

Dumbravuschs: Otto Curschellas e Sabrina Flepp

Presents: 56 persunas (inclus suprastonza ed actuar)

Perstgisas: neginas

Tractandas

1. Avertura
2. Approbaziun dil protocol dils 18 da december 2019
3. Sanaziun dalla Via dalla Staziun e dalla punt Tgamaura
4. Orientaziuns
5. Varia

1. Tractanda Avertura / Beinvegni

Il president communal Beat Roeschlin fa in cordial beinvegni a tuttas Tuatschinas ed a tuts Tuatschins, als commembers dil cussegl da vischnaunca ed als commembers dalla cumissiun da gestiun tier la tschun'avla radunonza da vischnaunca dil trienni 2017/2020.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ellas Tuatschinas nr. 12 dils 12 da zercladur 2020 e nr. 13 dils 26 da zercladur 2020 sco era sin la pagina d'internet dalla vischnaunca. Ultra da quei seigi vegniu reparti in messadi en mintga casada.

Ei dat neginas propostas da cumpletar ni midar la gliesta da tractandas, aschia che quella vegn declarada sco approvada. Ils posts sco dumbravuschs sorprendan Otto Curschellas e Sabrina Flepp.

Las votaziuns vegnan per ordinari fatgas cun maunpli. Tier las votaziuns cun maunpli ei la pluralitad da quels che voteschan decisiva, ein las vuschs ulivas ei la damonda renviada. Ina quarta dils votants presents san pretender scrutini.

2. Tractanda Approbaziun dil protocol dils 18 da decemer 2019

Il protocol ei staus publicaus ella Tuatschina nr. 1 dils 10 da schaner 2020. Per quei motiv vegn ei desistiu da preleger il protocol.

Votaziun:

Il protocol dalla radunonza da vischnaunca dils 18 da december 2019 vegn approbaus unanimamein.

3. Tractanda Sanaziun dalla Via dalla Staziun e dalla punt Tgamaura

Introducziun entras Beat Roeschlin, president communal:

Il cussegl da vischnaunca ha approbau il credit d'impegn per la sanaziun dalla via dalla Staziun e dalla punt Tgamaura a caschun dalla seduta dils 11 da mars 2020. La punt sco era la via stuein nus sanar proximamein. Quellas secattan numnadamein en in miserabel stan. La via ha dapli che 50 onns. Ultra da quei recamonda il cantun Grischun allas vischnauncas da surdar incaricas ad interpresas da baghegiar per cheutras sustener ellas duront la crisa da corona.

La via ei da gronda impurtonza per nossa vischnaunca. La sanaziun da quella inclus la punt Tgamaura havein nus gia risguardau ella planisaziun d'investiziuns (quen d'investiziuns). Il process politic ei pia gia daditg vegnius lantschus.

Presentaziun dil project entras Guido Monn, genau:

Cun grond plascher astgel jeu presentar a vus oz il project per la sanaziun dalla Via dalla Staziun inclus la punt Tgamaura. Ei setracta cheu d'ina impurtonta via da colligiaziun sigl intschess da nosssa vischnaunca. La via ei 360 meters liunga e rodund 60 onns veglia. Ella ha en plirs loghens sfendaglias. Entras quei svanescha l'aua ella fundaziun. En certs loghens crescha il pastg atras la via. Ils davos onns ein pintgas remeduras vegnidas fatgas vid la via (flics). Sper la sanaziun eisi previu da construir in passapei che colligia la Via Alpsu cuagl areal dalla staziun. Las lingias d'aua vegnan medemamein remplazzadas sigl entir tschancun dalla via. Ultra da quei eisi previu da plazzar sil tschancun dalla via tumbins per la rimnada dallas auas da meteo che ston vegnir menadas naven tenor il plan general d'allontanament d'aua. El rom dil project remplazzescha l'energia era pliras lingias d'electricidad e procurescha per l'illuminaziun.

La punt ei era donnegiada. Il betun ha en plirs loghens fessas. Ils cordons dalla punt ein donnegiai entras il sal e l'aua. En certs loghens eisi veseivel ch'il fier varga ord il betun. Ils cabels da tensiun ella punt adempleschan buca pli lur funcziun el connex culla statica. Sut la punt vegn salpeter neunavon. Ils pilasters e la platta ein medemamein en decadenza. La platta da betun dalla punt lai ir atras aua. Sper la sanaziun eisi previu da construir in tschabergal silla punt sco sigl areal dalla staziun per aschia garantir la segirtad pils pedunzs.

Pil turissem ha la via ina gronda muntada. La via ei vegnida construida duront il temps dalla construcziun dils lags da fermada. Dapi lu ha la vischnaunca fatg in grond svilup turistic e la via ha uss in'otra muntada. Ella ei daventada ina impurtonta colligiaziun per la staziun dalla Viafier Matterhorn Gotthard e per las pendicularas. Muort la sanaziun dalla staziun retscheiva la via aunc ina pli gronda muntada strategica pil turissem. Il diever dalla via ei in criteri, daco che nus stuein sanar tala. Ei setracta numnadamein d'ina via che vegn bein frequentada dils hosps sco era dils indigens per ir a spassegiar ni per contonscher la senda ni il passapei enviars Rueras ni anavos. Ils indigens fan medemamein diever da quella via per ir a spassegiar cun lur famiglias ed ils affons pigns (crotschas). Nus mein da quei anora che la sanaziun dalla staziun ha per consequenza ch'il traffic dils pedunzs vegn a crescer.

Per la sanaziun dalla via seresultan cuosts totals incl. taglia sin plivaleta ella summa da frs. 1'093'155.00 e per la sanaziun dalla punt Tgamaura cuosts totals ella summa da frs. 953'145.00. Igl entir project cun l'illuminaziun e la canalisaziun caschuna cuosts totals ella summa da frs. 2'305'857.00. La calculaziun dils cuosts sa svariari per 10%.

Igl ei planisau da sanar la Via dalla Staziun en duas etappas:

- **1. etappa (2020):** sanaziun dalla punt
- **2. etappa (2021):** sanaziun dalla via

Cun la sanaziun dalla via dalla staziun risguarda la vischnaunca in cert ritmus tier las sanaziuns ed il manteniment dallas vias. Ils davos 4 onns ein las suandontas vias vegnidas sanadas: *la via viers la Tgèsa s. Vigeli, Via Gionda e Via Strem*. Las proximas vias ch'igl ei previu da sanar: *Via Dentervitgs, Via Niriel e la Via Bugnei*. La sanaziun dalla staziun e la construcziun dalla punt Drun ha liug circa 2022/2023

Informaziuns tier il project entras Beat Roeschlin, president communal:

Damai ch'ei ha dau ils davos dis discussiuns e revoltas pervia dalla procedura da perimeter, vi jeu informar oz vus detagliadamein davart quella tematica.

Il credit pil project dalla sanaziun dalla via e dalla punt sto vegnir concedius entras ils gremis corrispundents. Quei ei reglau aschia ella costituziun communal sco era ella lescha da finanzas cantunala.

Procedura da perimeter:

La procedura da perimeter vegn lantschada. La cumpart dils cuosts dils privats e dalla vischnaunca sco era il territori dil perimeter vegnan communicai allas personas pertuccadas sco era publicai el fegl official. Tuts han la pusseivladad d'inoltrar ina protesta enteifer in temps da 30 dis encunter la cumpart dils cuosts dils privats, la cumpart dils cuosts dalla vischnaunca sco era encunter il territori dil perimeter. Suenten ch'il temps da far protesta ei spiraus, ha la suprastanza communal da tractar las protestas inoltradas e da comunicar lur decisiuns allas personas pertuccadas. En in proxim pass vegnan ils cuosts (aconto) da perimeter tarmetti a mintga persona pertuccada. Culla finiziun dil project vegn la repartiziun finala dils cuosts communicada allas personas pertuccadas. Encunter la repartiziun finala dils cuosts han las personas puspei 30 dis temps d'inoltrar ina protesta. Silsuenten tracta la suprastanza communal las protestas inoltradas.

Damai che quella fatschenta ha procurau per bia malruaus avon la radunonza communal, ha la suprastanza communal decidiu da schar votar giu vus, sche vus vuleis insumma entrar ella fatschenta:

Votaziun:

La radunonza communal decida cun 52 vuschs encunter 4 vuschs ed 0 abstenziuns d'entrar ella fatschenta.

Discussiun:

Tumaisch Valier, vischin da Camischolas:

La sanaziun dalla via inclus la punt ei necessaria. Quella mettel jeu insumma buca en damonda. Jeu sedamondel sch'ei fuss buca pli prudent da sanar la via cura che la sanaziun sigl areal dalla staziun Sedrun ha liug en dus onns. Las explicaziuns tier la procedura perimeter entras il president communal ein correctas. Tenor miu meini fuss ei denton stau pli prudent sche la procedura da perimeter fuss gia vegnida lantschada. Ella lescha ei la cumpart dils cuosts da perimeter maximala e minimala che la vischnaunca ha da surprender fixada. La suletta damonda ch'jeu hai: Stat la decisiun davart la cumpart dils cuosts da perimeter dalla vischnaunca e dils privats buca en cumpetenza dalla radunonza communal?

Beat Roeschlin, president communal:

La suprastanza communal definescha la contribuziun da perimeter respectivamein la cumpart dils cuosts che la vischnaunca ed ils privats han da surprender vid il project sco era il territori dil perimeter. La lescha dalla planisaziun locala scriva avon la procedura da perimeter. Las personas pertuccadas dalla procedura da perimeter vegnan informadas davart la cumpart dils cuosts ed il territori pertuccau dil perimeter e han la pusseivladad da far protesta enviers quels dus fatgs. Ils burgheis han aschia ils dretgs necessaris. Per la fixaziun dalla cumpart dils cuosts ei buca la radunonza communal competente, mobein la suprastanza communal. La lescha scriva avon che la comunicaziun davart la repartiziun dils cuosts da perimeter ha da succeder cuort avon l'entschatta dallas lavurs dil project ni cuort suenter.

Vendalin Giossi, vischin da Camischolas:

Davart l'impurtonza dalla via havein nus gia discussiunau. Quei ei ina fetg principala via. Ella survescha allas pendicularas, alla Viafier Matterhorn Gotthard ed a plirs quartiers (Salins, etc.), quei oravontut duront igl unviern cura che la Via Gionda e la Via da scola ein serradas. Era pils habitonts dalla Via Dentervitgs ei quella via in impurtont access. Ils habitonts da quels quartiers ston far diever da quella via. Els han negina autra pusseivladad. La Via Dentervitgs sto proximamein vegnir sanada. Era ils hosps dil tren ed auters che transporteschan rauba alla staziun fan diever da quella via. Jeu supplicheschel ch'ei vegni tratg en consideraziun tier la fixaziun dalla contribuziun da perimeter che biars ein avisai sin quella via. Ils quartiers che fan diever da quella via, han numnadamein buca ina autra letga.

Beat Roeschlin, president communal:

Ella procedura perimeter han tuttas personas pertuccadas la pusseivladad d'inoltrar ina protesta. Jeu vi uss denton buca discussiunar davart la procedura da perimeter. Nus essan oz cheu per tractar il credit d'impegn necessari ella summa da frs. 2'305'857.00. Las damondas ch'il cussegl da vischnaunca ha tschentau: Eisi prudent da construir in passapei? Seresulta in respargn da cuosts tier ina construcziun alternativa? Quei ein damondas che nus stuein tematisar oz. La procedura da perimeter succeda silsuenter en in process separat.

Pius Cavegn, vischin da Camischolas:

Jeu hai buca da far objecziuns enviers il project. La necessitad da sanar la via e la punt ei avon maun. Jeu engraziel als responsabels per la buna presentaziun dil project. Ils davos 30 onns ei la procedura da perimeter adina succedida avon che las lavurs da construcziun dil project corrispudent ein vegnidas lantschadas. La situaziun d'oz ei sco da cumprar il giat el sac. Ei fuss pli sempel da prender oz ina decisiun, sche vus havessas saviu presentar a nus ils cuosts che seresultan per las personas pertuccadas dalla procedura da perimeter. Ein la construcziun dil passapei e la sanaziun dalla punt risguardai tiels cuosts totals dil perimeter? Igl acquist dil terren supplementar el connex culla sanaziun dalla via vegn ad esser ina sfida, damai ch'ei setracta da parcadis attractivs che secattan gest sper via.

Beat Roeschlin, president communal:

Tgei ei impurtont da risguardar el rom dalla procedura da perimeter? La sanaziun dalla via ei gia vegnida menziunada sco ina part impurtonta per la strategia dalla vischnaunca. Era igl interess public gioga ina impurtonta rolla. Tier la fixaziun dalla contribuziun da perimeter eisi pia da risguardar igl interess public e la punt ch'ei ord vesta strategica da gronda impurtonza. In'otra damonda che nus stuein tschentiar en quei connex: S'audan ils cuosts per la construcziun dil passapei tier ils cuosts da perimeter ni buca?

Tenor miu meini savess la vischnaunca surpender ina cumpart da 80% tochen 100% dils cuosts per la sanaziun dalla punt, damai che quella ei d'impurtonza per la publicitad. Ils cuosts restonts san vegnir risguardai ella procedura da perimeter. Quei ei denton mo miu meini personal. L'examinaziun davart la fixaziun dils cuosts da perimeter succeda entras la nova suprastanza communal. Jeu fetgel denton aunc inagada attents tuttas personas davart la pusseivladad da far protesta. Quei dretg ha in e scadin.

Theodor Berther, vischin da Camischolas:

Jeu vegnel aunc inagada anavos sil votum da Tumaisch Valier. Ei setracta cheu d'in project da plirs milliuns. Schai la fixaziun dalla contribuziun dil perimeter respectivamein dalla cumpart dils cuosts che la vischnaunca ha da surpender per la sanaziun e la cumpart dils cuosts che las personas pertuccadas dil perimeter han da finanziar, buca en cumpetenza dalla radunonza communal? Ella constituziun communal eisi numnadamein stipulau che la radunonza communal decida davart projects da plirs milliuns. Jeu sai buca metter avon che la suprastanza communal ha la cumpetenza da fixar las cumparts dils cuosts dil perimeter. Plinavon fuss ei prudent da fixar la contribuziun da perimeter avon che lantschar las lavurs da construcziun el rom dil project.

Beat Roeschlin, president communal:

La suprastanza communal ha la cumpetenza da fixar la contribuziun da perimeter. Silsuenter han las personas pertuccadas il dretg da far protesta el rom dalla consultaziun dalla procedura da perimeter.

Vendalin Giossi, vischin da Camischolas:

Separticipeschan las pendicularas e la Viefier Matterhorn Gotthard era vid ils cuosts per la sanaziun dalla punt e dalla via?

Beat Roeschlin, president communal:

Secapescha han las pendicularas e la Viefier Matterhorn Gotthard era da separticipar vid ils cuosts dalla sanaziun. Muort quellas duas interpresas havein nus bia traffic sin quella via. Il principi per la repartiziun dils cuosts risguarda numnadamein quels che fan diever dalla via e caschunan cheutras cuosts.

Sandro Maissen, vischin da Camischolas:

A con munta la summa totala dils cuosts da perimeter che vegn repartida sillas persunas pertuccadas dalla procedura da perimeter? Finanzieschan la Viafier Matterhorn Gotthard e las pendicularas ina gronda cumpart dils cuosts?

Beat Roeschlin, president communal:

Jeu havess era interess da saver con ch'jeu stoi pagar, sch'jeu fuss en possess d'ina casa el territori dil perimeter. Quella damonda sai jeu denton buca rispunder oz. La Viafier Matterhorn Gotthard e las pendicularas vegnan a stuer surpender ina cumpart vid ils cuosts. La summa ei pil mument aunc buca fixada. Guido Monn, genau, ha fatg pliras calculaziuns el connex culs cuosts dil perimeter. Nus savein denton buca presentar quellas oz a vus, damai ch'ei setracta sulettamein da calculaziuns approximativas.

Norbert Vinzens, vischin da Sedrun:

La damonda principala che setschenta: Ei quei ina via da quartier ni ina via da colligiazium? Sch'ei fuss ina via da quartier, havessen ils responsabels stuiu lantschar la procedura da perimeter avon che suttametter il credit d'impegn per tractaziun alla radunonza communal. Damai ch'igl ei ina via da colligiazium sco igl ei vegniu declarau, ei igl agir dalla suprastonza communal corrects.

Désirée Willimann, vischina da Sedrun:

Con urgenta ed impurtonta ei la sanaziun dalla via e dalla punt? Sto quella vegnida menada atras uss?

Guido Monn, genau:

La punt ei en in miserabel stan e sto vegnir sanada el decuors dils proxims treis onns. Quei ha in'analisa ch'ei vegnida fatga mussau. La via ei era en in schliet stan sco vus haveis viu avon sillas fotografias.

Sandro Maissen, vischin da Camischolas:

Tenor miu meini fuss ei pli prudent da sclarir all'entschatta con bia che las pendicularas e la Viafier Matterhorn Gotthard ston pagar vid ils cuosts dalla sanaziun. Ils cuosts restonts san silsuenter vegni reparti sillas persunas pertuccadas dalla procedura da perimeter.

Beat Roeschlin, president communal:

La repartiziun dils cuosts succeda tenor il principi dil caschunader. El connex cun quella repartiziun ston era la Viafier Matterhorn Gotthard e las pendicularas separticipar als cuosts.

Sandro Maissen, vischin da Camischolas:

Ei fuss tuttina stau pli prudent da sclarir en in εμπrem pass, tgei cumpart finanziaria che quellas interpresas contribueschan al project. Aschia havessen las persunas pertuccadas dalla procedura da perimeter saviu gia ordavon, tgei cuosts che spetgan sin ellas.

Tumaisch Valier, vischin da Camischolas:

La procedura da perimeter el connex cul project havess'ins gia da daditg saviu lantschar.

Beat Roeschlin, president communal:

En in empren pass ha la vischnaunca da conceder il credit d'impegn (brutto). Silsunter succeda la procedura da perimeter. La procedura da perimeter sa vegnir lantschada cuort avon ni cuort suenter la sanaziun dalla punt e dalla via.

Erwin Monn, vischin da Camischolas:

Guido, Ti has mussau la planisaziun dallas lavurs el connex culla sanaziun dalla via e dalla punt. Vegnan quellas lantschadas proximamein?

Guido Monn, genau:

Igl onn 2020 vegn la punt sanada. La primavera 2021 ei la sanaziun dalla via previda.

Erwin Monn, vischin da Camischolas:

Eisi realistic da tener en quels termins?

Guido Monn, genau:

Gie, igl ei pusseivel da tener en quels termins. La surdada dallas lavurs succeda immediat suenter che la radunonza communal ha concediu il credit d'impegn.

Erwin Monn, vischin da Camischolas:

Ei quei pusseivel? La procedura da perimeter ei gnanc aunc publicada.

Guido Monn, genau:

Tier la procedura da perimeter setracta ei d'in process separat. Oz va ei mo per il project respectivamein per conceder il credit d'impegn corrispudent.

Votaziun:

La radunonza da vischnaunca decida cun 48 vuschs encunter 6 vuschs ed 1 abstenziun da conceder in credit d'impegn ella summa da frs. 2'305'857.00 per la sanaziun dalla Via dalla Staziun e dalla punt Tgamaura.

4. Tractanda Orientaziuns

Beat Roeschlin, president communal.

Concessiun per la Viafier federala – aua sutterrana

Il 12 da fenadur 2020 ha il pievel tuatschin da votar all'urna davart la concessiun d'aua che la vischnaunca vul dar alla Viafier federala.

La vischnaunca surdat alla Viafier federala il dretg per l'utilisaziun dall'aua sutterrana. Il menaschi da mintgadi basegna senza interrupziun in quantum d'aua da 20 l/s. Ord ils dus indrezs da pumpadi giu las Rueras retila la Viafier federala rodund 7.9 l/sec aua sutterrana (menaschi usitau). En cass da basegns sa la prestaziun dils dus indrezs da pumpadi vegnir augmentada sin maximalmein 16.3 l/s. L'aua restonta da diever deriva dallas tschaffadas el Tgom. La capacitat dallas lingias d'aua da diever ei concepida per in profil da deflussiun da maximalmein 30 l/s. Las auas tschaffadas el Tgom ensemen culs dus pumpadis garanteschon il provediment fundamental. Sa il quantum d'aua buca vegnir garantius entras il provediment fundamental muort ina situaziun extraordinaria, vegn il provediment supplementar ord il lag artificial dallas Ovras electricas Reinanteriur SA en funcziun. La Viafier federala ha aschia da pagar alla vischnaunca per la concessiun en tut in tscheins annual da frs. 263'758.00 (menaschi usitau).

Residenza Dulezi

Ei era previu che la vischnaunca Tujetsch finanziescha il secund plaun sutterranean dalla Residenza Dulezi. Il credit corrispundent ei vegnius concedius a caschun dalla radunonza dils 23 da zercladur 2017. El secund plaun sutterranean secattan 13 parcadis, ils tschalers e las localitads pils indrezs technics. Ils habitonts dalla Residenza Dulezi e las fatschentas secasadas fan diever da quella garascha e dallas ulteriuras localitads sin quei plaunterren. Ord quei motiv fa ei senn ch'il secund plaun sutterranean s'auda alla Residenza Dulezi. La Residenza Dulezi SA ei habla da financiar il secund plaun sutterranean. La vischnaunca ha dameins expensas entras quella nova finanziaziun e sa aschia impunder il respargn en auters projects che stattan sin rucca.

Damai che la Residenza Dulezi SA duei uss era financiar la garascha sutterranean e l'entrada dalla garascha el secund plaun sutterranean eisi era necessari e prudent d'engrondir la surfatscha dil dretg da baghegiar.

Il cussegl da vischnaunca ha approbau l'adattaziun dil dretg da baghegiar e va d'accord culla nova sligiazion da finanziaziun. Uss ha aunc la radunonza communal da decider davart quella fatschenta. Quella radunonza communal ha liug venderdis, ils 10 da fenadur 2020.

Contract da servitut cull'Andermatt Sedrun Sport SA

A caschun dalla davosa radunonza communal che ha giu liug mesjamna, ils 18 da december 2019 ha il vischin Beni Hendry fatg attents nus silla situaziun meins cuntenteivla dil territori da skis Andermatt-Sedrun. El ha fatg attents nus che las prestaziuns dalla vart da Sedrun seigien vegnidas mendras ils davos onns. Nus havein constattau d'ina vart che la ladezia dalla pista ei vegnida pli pintga. Da l'autra vart vegn ei buca pli surviu ell'ustria Milez. L'ustria ha cheutras piars ina certa qualitat. Ultra da quei ei il parc da divertiment (snowpark) vegnius spustaus silla vart d'Andermatt. Jeu hai cunfrontau ils responsabels dall'Andermatt-Sedrun Sport SA (ASS SA) cun quellas constataziuns e fatg attents els sil contract da servitut che la vischnaunca Tujetsch ha stipulau cun l'ASS. Quei contract ha in cuoz da 20 onns. El ei

vegnius stipulaus avon 8 onns. Plirs puncts da quei contract, denter auter era el connex cun las prestaziuns vegnan buca teni en dall'Andermatt Sedrun Sport SA. Nus havein informau ils responsabels dall'ASS davart quels puncts. Dacuort havessen nus giu ina seduta cun els. Quella ei denton vegnida dada giu da lur vart cuort avon il termin.

Nus stuein sedustar e star en per nos interess. La situaziun actuala savein nus buca acceptar. La nova suprastanza communal vegn uss a sefatschentar cun quella tematica ed encurir danovamein il discuors culs responsabels dall'Andermatt-Sedrun Sport SA.

5. Tractanda Varia

Vigeli Giossi, vischin da Rueras:

Sco εμπrem engrazièl jeu a Beat Roeschlin per la buna lavur ch'el ha prestau per nossa vischnaunca. Ensemen cun Tei Beat hai jeu sco tgauvitg giu enqualina interessanta discussiun. Grond engraziament per Tiu engaschi en favur da nossa vischnaunca. Ultra da quei vi jeu engraziar a tuts ils auters ch'èin s'engaschai ils davos treis onns per Tujetsch. Jeu sperel che vus hagièis semtgau in regal per Beat, damai ch'el ei mo pli 4 dis en uffeci.

Uss hai jeu aunc ina supplica. Sumsassi ei ina bellezza liug. Avon 2 jamnas sundel jeu casualmein staus en quei liug. Jeu hai fatg persenn ch'ins vesa buca viers Sedrun, damai ch'ina plonta cuviera l'entira vesta. Jeu supplicheschel ils responsabels digl Uffeci forestal da pinar quella plonta.

Guido Monn, genau:

Quei ei in bi liug. Jeu prendel bugen encunter la supplica dil vischin Vigeli Giossi.

Bruno Berther, vischin da Rueras:

Vegn la via cantunala (Sumsassi) sanada proximamein?

Guido Monn, genau:

Nus essan vid da sclarir ils detagls da quei project. Cun resalva sai jeu dir che la sanaziun ei previda igl onn 2022. Forsa sa il vischin Pius Cavegn dapli en caussa.

Bruno Berther, vischin da Rueras:

El connex culla sanaziun dalla via savess la vischnaunca construir in plaz public a Sumsassi cun tablas d'informaziun ed in kiosc pils hosps.

Guido Monn, genau:

Jeu prendel bugen encunter quella supplica.

Pius Cavegn, vischin da Camischolas:

Sumsassi ei in bellezza liug.

Nus havein ina cumissiun ch'ei sefatschentada culs vegls nums locals. Cura ch'jeu ha legiu che la punt ei vegnida battegiada cul num Punt Tgamaura, hai jeu fatg persenn che quei ei buca correct. La Tgamaura secatta numnadamein denter Zarcuns e Camischolas. La punt secatta datier dalla Via Fravia. Jeu supplicheschel vus ord quei motiv d'adattar il num dalla punt.

La sanaziun dalla via cantunala (s. Brida / Sumsassi) duei vegnir lantschada igl atun 2021.

Guido Monn, genau:

Jeu engraziol al Pius Cavegn per quellas informaziuns.

Renato Decurtins, genau:

Oz havein nus da prender cumiau da dus consuprastonts, numnadamein da Mario Hitz e da Beat Roeschlin. Gliendisdis vargau han els giu lur davosa seduta da suprastonza. Avon rodund 6 onns havein nus treis entschiet la carriera en suprastonza communal cun André Schmid ch'era da lezzas uras gia ina veglia uolp. Il mars 2015 has Ti Beat surpriu il tgamun dalla vischnaunca. Enteifer quels varga tschun onns has Ti realisau beinenqual project. Jeu vi mo numnar entginas fatschentas:

- Nova lescha dallas taxas da hosps e turissem
- Project - halla plurivalenta Dulezi
- Project - Residenza Dulezi
- Penderulara Salins-Cuolm da Vi – preparaziun dil messadi pigl emprest ed ils dretgs
- Lescha per la promoziun dall'economia
- Lescha energia alpina

La davosa fatschenta che Beat ha liquidau ei il contract da concessiun culla Viafier federala che generescha alla vischnaunca eifer 40 onns ina summa totala da frs. 10 miu. Quella buna entrada annuala ei d'engraziar cumpleinamein ad el. Enteifer siu temps d'uffeci ha Beat menau 143 sedutas da suprastonza. Quellas cuozzan rodund 5 uras. Mario ha fatg part a 161 sedutas da suprastonza. Ultra da quei ha Beat priu part a 39 radunonzas dil cussegl da vischnaunca e menau atras 11 radunonzas communalas. El ei sefatschentaug bugen cullas finanzas. Nus havein sentiu beinspert che Beat sesenta da casa leu. Mario ei semess en cun tgierp ed olma per la cultura e giuventetgna da nossa vischnaunca. Il davos project ch'el ha realisau ein las structuraz dil di ella Scola Sedrun. Plirs projects che nus havein realisau en suprastonza eran gia vegni lantschai dall'anteriura suprastonza communal.

Preziau Beat, preziau Mario, nus havein giu in interessant temps ensemen ed empiriu beinenqual causa. Il Beat ei plitost ina persuna impulsiva e Mario plitost in tip ruasseivel. Quella buna mischeida ei vegnida d'engrau alla atmosfera en suprastonza communal. El num dalla populaziun tuatschina, dalla suprastonza communal, dall'administraziun communal e da tuts collaboraturs engraziol jeu cordialmein a vus dus per quei bi temps comunabel e la buna lavur che vus haveis prestau en favur dalla vischnaunca Tujetsch. Gudi uss il temps liber che spetga sin vus.

Beat Roeschlin, president communal:

La lavur culla suprastanza communal ei stada professiunala e collegiala. Nus havein giu bunas discussiuns ed ils commembers dalla suprastanza ei s'engaschai fermamein pil beinstar communal. Jeu vi engraziar all'entira suprastanza per la buna collaboraziun. All'entschatta da miu uffeci hai jeu giu grond sustegn dad André Schmid. El ei oz era cheu presents. Grond engraziament persunter. Oravontut plaschiu zun fetg a mi han las vivas discussiuns eifer il cussegl da vischnaunca.

Jeu engraziel alla populaziun tuatschina per la confidanza enviers mia persuna ch'jeu hai retschert sco president communal. Duront il temps a Tujetsch sundel jeu era semidaus persunalmein. Miu feigl ha detg ch'jeu seigi vegnius pli socials. Jeu selegrel uss sil temps cun mia dunna Rita. Dapi 25 onns sundel jeu regularmein naven da casa muort mia professiun. Uss sai jeu per l'emprema gada guder dapli temps cun mia dunna.

Stei sco vus essas. En da quels temps giavischel jeu a vus oravontut buna sanadad. Ella vischnaunca Tujetsch regia ina buna cultura politica. Era ils giuvens han interess vid la politica communal. La vischnaunca stat sin bunas combas finzialas e ha ord mia vesta bunas perspectives.

Sedrun, ils 29 da zercladur 2020

Actuar:
Simon Collenberg

President communal:
Beat Roeschlin